

武英殿聚珍版書

016

禹貢指南



.

.

.

.

.



.

.



御製題武英殿聚珍版十韻

有序

校輯永樂大典內之散簡零編並蒐訪天下遺籍不  
下萬餘種彙爲四庫全書擇人所罕覩有裨世道人  
心及足資考鏡者剞劂流傳嘉惠來學第種類多則  
付雕非易董武英殿事金簡以活字法爲請旣不濫  
費棗梨又不久淹歲月用力省而程功速至簡且捷  
考昔沈括筆談記宋慶歷中有畢昇爲活版以膠泥  
燒成而陸深金臺紀聞則云毘陵人初用鉛字視版  
印尤巧便斯皆活版之權輿顧埏泥體麤鎔鉛質軟

俱不及鋟木之工緻茲刻單字計二十五萬餘雖數  
百十種之書悉可取給而校讎之精今更有勝於古  
所云者第活字版之名不雅馴因以聚珍名之而系  
以詩

稽古搜四庫於今突五車開鐫思壽世積版或充閭張  
帖唐院集周文梁代餘同爲製活字用以印全書精越

鷓冠體昨歲江南所進之書有鷓冠子卽活字版第字體不工且多訛謬耳富過鄴架儲

機圓省雕氏功倍謝鈔胥聯版事堪例埏泥法似疎毀

銅昔悔彼康熙年間編纂古今圖書集成刻銅字爲活版排印葢工貯之武英殿歷年旣久銅字或

被竊缺少司事者懼干咎通值乾隆初年京師錢貴遂  
請毀銅字供鑄從之所得有限而所耗甚多已爲非計  
且使銅字尚存則今之印書刊木此慙予既復羨梨棗  
不更事半功倍乎深爲惜之  
還教慎魯魚成編示來學嘉惠志符初

乾隆甲午仲夏





禹貢指南

武英殿聚珍版原本

提要

臣等謹案明焦竑經籍志載禹貢指南一卷宋毛晃撰宋史藝文志無之朱彝尊經義攷亦云未見又云文淵閣書目有之不著撰人疑卽晃作晃宋史無傳世所傳增註禮部韻略于紹興三十二年表進自署衢州免解進士者卽其人也書引爾雅周禮漢志水經注九域志諸書而旁引他說以證古今山水之原委頗爲簡明雖生于南渡偏安



之後僻處一隅無由睹中原西北之古蹟一一親核其真而援據攷證獨不泥諸儒附會之說故後來朱子書說及蔡氏集傳多用之亦言地理者所當攷也世無傳本其體例之舊不可見永樂大典所載與諸家註解散附經文各句下今綴錄成編釐爲四卷依經文次第標列其無註者則經文從略焉乾隆三十八年六月恭校上

禹貢指南卷一

宋 毛 晃 撰

冀州

爾雅兩河閒曰冀州郭璞注曰自東河至西河李巡  
注曰兩河閒其氣清厥性相近故曰冀冀近也 周  
禮職方氏河內曰冀州謂其在三河之內蓋東河之  
西西河之東南河之北也 案禹貢導河積石自積  
石而下南流謂之西河至于華陰折而東經砥柱山  
又東逕孟津東過洛水之北皆東流謂之南河至于

大伾山折而北流過降水至于大陸又北播爲九河  
同爲逆河入于海謂之東河爾雅言兩河閒者舉其  
二則三可知也 晉地理志春秋元命苞云昴畢散  
爲冀州亂則冀安弱則冀強荒則冀豐 孔安國曰  
舜分冀州之域爲幽州并州孔穎達曰據職方氏幽  
并山川皆冀州之域故安國知之 杜牧罪言禹畫  
九土一曰冀州程其水土與河南等常重十一二以  
其恃強不循理冀其必破弱雖已破冀其復強大因  
以爲名

既載壺口

九域志河東隆德府潞州上黨郡上黨縣壺口山在上黨東太行山在上黨南 漢地理志在河東郡北 屈縣東南今隰州吉鄉縣也

治梁及岐

梁山 在左馮翊夏陽縣西北 水經河水南逕梁山原東酈道元注自原山東南至河晉之望也穀梁傳成公五年梁山崩遏河水三日不流晉侯以問伯宗卽是處也 九域志今永興縣卽同州馮翊郡定

國軍有梁山山在龍門之南

岐山 水經在右扶風美陽縣西北梁岐二山在雍州今于冀州言之者豈當時河患上及梁岐乎禹導底柱則壺口平而梁岐自治因河而言非以二山爲冀州之地也

既修太原至于岳陽

太原晉陽也今并州之地高平曰原此又原之大者太岳導山序壺口雷首至于太岳水經太嶽山在河東永安縣南職方氏冀州山鎮曰霍山案霍山有

二在冀州者又謂之太岳在荊州者又謂之天柱山  
灑水出焉漢地理志作岳陽注在太原西南

覃懷底績至于衡漳

覃懷 九域志今河北西路懷州河內郡卽其地

濁漳水一名降水導河序北過降水至于大陸是也

顏師古注漢地理志衡漳謂漳水橫流而入河也

水經清漳水出上黨沾縣西北少山大鼃谷南過

縣西又從縣南屈東過涉縣西屈從縣南東至武安

縣南黍窖邑入于濁漳酈注淮南子曰清漳出揭戾



山高誘云在沾縣漢分沾縣爲樂平郡治沾縣晉太  
康地記曰樂平縣舊名清漳涉縣魏郡之屬縣也  
九域志河北東路冀州信都郡定武軍有昌亭城  
水經云漳水東北至昌亭今滹沱衡漳水今長蘆河  
則其故瀆也

厥賦惟上上錯厥田惟中中

諸州雜賦 冀上上錯揚下上上錯豫錯上中梁下  
中三錯

諸州田賦 雍田上上徐田上中青田上下豫田中

上冀田中中兗田中下梁田下上荆田下中揚田下  
下冀賦上上豫賦雜出亦上上冀賦雜出上中豫賦  
亦上中荆賦上下青賦中上徐賦中中兗雍之賦中  
下揚賦雜出亦中下揚賦下上梁賦雜出亦下上梁  
賦下中梁賦雜出又下下雍青徐以上地出中賦冀  
以中地出上賦

恒衛旣從大陸旣作

恒水 出常山上曲陽東入滌水 水經滌水出代  
郡靈邱縣高氏山南過廣昌縣南又東南過中山上

曲陽縣北恒水從西來注之注涇水兼納恒川之通稱

衛水 出常山靈壽縣東北入滹沱河

大陸 在鉅鹿縣北爾雅晉有大陸注今鉅鹿北廣河澤是也大陸之野一名朝歌商紂之所都也 水

經注引應劭曰麓者林之大也尙書曰堯將禪舜納之大麓之野烈風雷雨不迷致之以昭華之玉而縣取目焉秦始皇二十年滅趙以爲鉅鹿郡漢景帝中元元年爲廣平郡武帝征和三年爲廣平侯國光武

中興更爲鉅鹿今屬邢州汲郡脩武縣亦有大陸

島夷皮服

島夷 漢地理志作鳥夷顏師古曰東北夷搏取禽獸食其肉衣其皮也一說居海島被服容止皆象鳥作鳥謂居海島也

夾右碣石入于河

碣石山 在海畔右北平驪城縣西南河自碣石山南渤海之北入海夾右夾音挾自海入河逆流而西右顧碣石如在挾掖也 水經碣石山在遼西臨渝

縣南水中注大禹鑿其石右夾而納河秦始皇漢武帝皆嘗登之海水西侵歲月逾甚而苞其山故言水中也 水經河水東北過甲下邑濟水從西來注之又東北入于海又東分爲二水枝津東逕甲下城南東南歷常沈注濟注經言濟水注河自枝津東北流逕甲下邑東北流入于海淮南子曰河九折注爲海而流不絕者崑崙之輸也禹貢曰夾右碣石入于河山海經曰碣石之山繩水出焉東流注于河河之入海舊在碣石今川流所導非禹瀆也周定王五年河

徙故瀆故班固曰商竭周移也 顏師古曰言禹夾  
行此山之右而入于河逆上也孔傳同 凡九州未  
言由諸水入河者皆通舟楫漕運以達京師也

### 濟河惟兗州

東南據濟西北距河河濟之間相去不遠兗州之界  
止于濟也 爾雅濟河閒曰兗州注自河東至濟

周禮職方氏河東曰兗州 武王封周公子伯禽于  
曲阜爲魯侯秦爲薛郡後魏置南兗州于譙城置西  
兗州于定陶城隋改爲魯州唐武德初平徐圓朗復



為兗州 晉地理志兗州濟河地舜置十二牧則其一也春秋元命苞云五星流為兗州兗端也信也又曰蓋取兗水以為名焉

九河既道

徒駭 郭璞曰今在成平縣義未聞

太史 郭璞曰今所在未詳

馬頰 郭璞曰河勢上廣下狹狀如馬頰案原本缺太史馬頰

二河今補入

覆鬴 郭璞曰水中可居住往而有狀案今本爾雅注作水中可

居住而  
有狀如覆釜

胡蘇 郭璞曰東莞縣今有胡蘇亭其義未詳

簡 郭璞曰水道簡易

絜 郭璞曰水多約絜

鈎盤 郭璞曰水曲如鈎流盤桓也

鬲津 郭璞曰水多阨狹可隔以爲津而橫渡

爾雅九河皆禹所名 正義曰河自大陸以北數爲

九河謂大陸在冀州嫌九河亦在冀州故云在此州

界也河從大陸東畔北行而東北入海冀州之東境

至河之西畔水分大河東爲九道故知在兗州界平原以北是也李巡曰徒駭禹疏九河以徒衆起故云徒駭太史禹大使徒衆通其水道故云太史馬頰河勢上廣下狹狀如馬頰也覆鬴水中多渚往往而處形如覆鬴胡蘇其水下流故曰胡蘇胡下也蘇流也簡大也河水深而大也絜言河水多山石治之苦絜絜苦也鈎盤言河水曲如鈎屈折如盤也鬲津河水狹小可鬲以爲津也孫炎曰徒駭禹疏九河用功雖廣衆懼不成故曰徒駭胡蘇水流多散胡蘇然其餘

同李巡 導河篇云濟水故渠今在冀州西界大陸  
今在德州德平縣經滄州清池縣西北太史今在德  
州安德縣東南經滄州臨津縣西馬頰在德州北平  
縣經安德縣西南恩州漳南縣東棣州商河縣北覆  
鬴今在永靜軍阜城縣東經東光縣西北胡蘇今在  
滄州南皮縣東光縣北經滄州無棣縣西北絜今在  
滄州南皮縣經滄州臨津縣鉤盤今在德州德平縣  
西經滄州樂陵縣東棣州陽信縣北滄州樂陵縣西  
南鬲津在德州平原縣東經滄州臨津縣東樂陵縣

西饒安無棣縣南並在德州平原以北惟簡河亡焉  
同爲逆河入于海今大名府石奔故瀆在焉

雷夏旣澤

雷夏澤 在濟陰成陽西北 水經注云雷澤西南

十許里有小山山北有小阜南屬池澤之東北有陶  
墟郭緣生言舜陶所在墟阜聯屬濱帶瓠河也一云  
舜所漁處本名夏澤

灘沮會同

灘水 灘於用切爾雅水自河出爲灘又云河有灘

又云灘反入郭注河水決出復還入者河之有灘猶江之有沱 漢地理志作雍沮沮水出常山元氏縣入河雍水不言出入

沮水 沮七餘切案沮水與雍州沮水不同荊州沮水在房陵左傳所謂江漢沮漳楚之望也導川云漆沮既從卽雍州之沮也今此沮水自會同于雷夏之間非雍州之沮也水經不著所出或云沮水出北地直路縣入洛洛非河南洛水也

厥土黑墳



再貢抄  
卷一  
土黑墳 墳扶粉切土脈墳起也

厥田惟中下厥賦貞

田中下第六

賦貞賦與田相當

厥篚織文

篚織文 漢地理志篚字作斐顏師古曰斐與篚同

竹器篚屬織文錦綺之類 冀州不言貢篚貢者下

以職供之謂也冀州帝都所在無所效其臣職故也

浮于濟漯達于河

濟水 沆水東流爲濟 爾雅濟爲澹澹音楚濟水  
出河東垣縣王屋山東南至河內武德縣入河並流  
而南截河又並流溢出乃爲滎澤也 水經濟水出  
河東垣縣東王屋山爲沆水又東至溫縣西北爲濟  
水又南當鞏縣北南入于河與河合流而東過滎陽  
縣北 漢地理志濟作沛州末言浮于濟潔達于河  
顏師古曰浮以舟渡也達通也因水入水曰通 又  
解在導川沆水濟水下

潔水 出東郡東武陽縣至樂安千乘縣入海 水

經漯水東出于高唐縣大河右迤東注漯水酈道元  
注曰桑欽地理志曰漯水出高唐余案竹書穆天子  
傳稱丁卯天子自五鹿東征釣于漯水是日祭丘己  
巳東征食馬于漯水之上尋其沿歷逕趣不得近高  
唐也桑氏所言蓋津流出次于其間也 地理風俗  
記曰漯水東北至于乘入海河盛則通津委海水耗  
則微消絕流

海岱惟青州

東北據海西南距岱

青州 東北跨海及遼東舜分青爲營州卽遼東也  
漢末公孫度據遼東自號青州刺史爾雅齊曰營州  
郭注自岱東至海此蓋商制無青州并青于徐周制  
有青無徐并徐于青故職方氏正東曰青州其山鎮  
曰沂山其澤藪曰望諸其川淮泗其浸沂沭 晉地  
理志青州蓋取土居少陽其色爲青故以名也春秋  
元命苞云虛危流爲青州

嶠夷旣略

嶠夷 堯命羲仲所宅處以其在東日所出故曰暘

谷

濰淄其道

濰水 出琅邪箕屋山北至都昌縣入海 水經濰

水出瑯邪箕縣東北過武城縣西又北過平昌縣東  
又北過高密縣西又北過淳于縣東又東北逕都昌  
縣東又東北入于海注云濰水導源濰山許叔重呂  
忱云濰水出箕屋山淮南子曰濰水出覆舟山蓋廣  
異名也

淄水 出泰山萊蕪縣原山東北至千乘博昌縣入

海 水經淄水與汶水同出泰山萊蕪縣原山東北  
又東北過臨淄縣東又東過利縣東又東北入于海  
漢地理志濰淄作惟留顏師古曰濰淄惟留古今  
通用道讀曰導導治也一說水復故道音上聲一音  
導謂導道而流也

海濱廣斥

斥鹵地也漢志海濱作海瀕廣斥作廣瀉注瀕音頻  
又音濱瀉音昔

厥田惟上下厥賦中上厥貢鹽絺海物惟錯岱畎絲枲



鉛松怪石萊夷作牧厥篚屨絲

田上下第三

賦中上第四

貢鹽絺海物絲臬鉛松怪石篚屨絲 顏師古曰屨  
桑也食屨之蠶絲可以弦琴瑟或曰屨山柘也蠶食  
柘葉者絲黃而韌可以爲弦

萊夷 春秋夾谷之會萊人以兵刦魯定公孔子曰  
兩君合好而夷裔之俘以兵亂之是知古者東萊之  
有夷也夾音刦 應劭十三州記曰泰山萊蕪縣魯

之萊柞邑也左傳與之無山及萊柞

案左傳本作辭以無山與之萊

柞是也齊靈公滅萊萊民稍流此谷邑落荒蕪故曰

萊蕪漢高祖置縣萊山之夷周曰萊子國漢曰東萊

浮于汶達于濟

汶水 爾雅汶為澗澗音闡 水經汶水出泰山萊

蕪縣原山西南過羸縣南又東南過奉高縣北屈從

縣西南流過博縣西北又西南過蛇邱縣南又西南

過岡縣北又西南過平章縣南又西南過無鹽縣南

又西南過壽張縣北又西南至安民亭入于濟注萊

蕪縣在齊城西南原山又在縣西南六十里許地理志汶水與淄水俱出原山西南入泲故不得過其縣南也從征記曰汶水出縣西南流淮南子汶水出朱虛弗其山乃東汶水非此也諸州之末皆記入河水道以堯都在冀而河行于冀也青州雖不言河而曰達于濟則因濟達河也地理志州末言浮于汶達于泲顏師古曰言渡汶水西達于泲也青州不言河由兗而見也兗州之末言浮于濟潔達于河謂渡濟潔而通河也青州次兗故言達于濟達通也因

水入水曰通渡汶通濟則渡濟可以通河矣

海岱及淮惟徐州

徐州 爾雅濟東曰徐州注云自濟東至海李巡注曰淮海閒其氣寬舒稟性安徐故曰徐徐舒也 周禮職方氏無徐州正義曰以徐州合之于青州青州分爲幽并 晉地理志徐州于周入青州之域春秋元命苞云天氏流爲徐州蓋取舒緩之義或云因徐邱以立名

淮沂其乂

淮水 出桐柏山其源遠矣于此言之者淮水至此而大爲害尤甚喜其治故于此紀之 淮水出胎簪山東北過桐柏胎簪蓋桐柏之旁小山也 水經淮水東至廣陵淮浦縣入于海 顏師古注漢地理志淮水出大復山 九域志壽春府有淮濱 胎簪山在南陽平氏縣

沂水 水經注沂水出尼邱山西北經魯之雩門曾點浴乎沂者非禹貢沂水也

蒙羽其藝

蒙山 水經注云禹貢有兩蒙山在徐州者在泰山  
蒙陰縣西南在梁州者在蜀郡青衣縣今日蒙頂

羽山 水經注在東海祝其縣南山西有羽淵禹父  
之所化其神爲黃龍入于羽淵 山海經曰洪水滔  
天鯀竊帝之息壤以堙洪水不待帝命帝令祝融殺  
鯀于羽郊 漢地理志藝作藝

### 大野旣豬

爾雅魯有大野郭璞注今高平鉅野縣東北大澤是  
也 鉅野縣今屬濟州 漢地理志作大埜 春秋

左氏傳哀公十四年春西狩于大野叔孫氏之車子  
鉏商獲麟杜預曰大野在東平鉅野縣東北大澤是  
也 周禮職方氏大野屬兗州澤藪

東原底平

東原 今東平郡鄆州在魯之西獲麟之地

羽畎夏翟嶧陽孤桐泗濱浮磬淮夷蠙珠暨魚厥篚玄  
織縞

漢地理志夏翟作夏狄泗濱作泗瀕暨魚作臬魚

篚元織縞 言獻黑細繒及鮮支也或謂織言質之

細而元之與縞其色也以織該于元縞之中則色雖不同皆織質也此乃古史立言之法猶雲土夢然耳  
禮記注云元與縞謂之織一曰白經黑緯曰織詩  
注亦作縵

浮于淮泗達于河

漢地理志州末言浮于淮泗入于河顏師古曰渡二水而入于河

汴河 右自淮泗入河必道于汴世謂隋煬帝始通汴入泗禹時無此水道以疑禹貢之言此特學者攷



之不詳而已案前漢書項羽與漢約中分天下割鴻溝以西爲漢以東爲楚文穎注云于滎陽下引河東南爲鴻溝以通宋鄭陳蔡曹衛與濟汝淮泗會于楚卽今官渡水也魏曹操與袁紹相持于官渡乃楚漢分裂之處蓋自秦漢以來有此安知非禹迹也禹貢九州之末皆記入河水道而淮泗獨不能入河帝都所在理不應爾意其必開此道以通之其後或爲鴻溝或爲官渡或爲汴上下百餘里閒不可必然皆引河水而注之淮泗也故王濬伐吳杜預與之書曰足

下既摧其西藩當徑取秣陵討累世之逋寇釋吳人于塗炭自江入淮逾于泗汴沂河而上振旅還都亦曠世一事也王濬舟師之盛古今絕倫而自汴水沂河可以班師則汴水之大小當不減于今又足以見秦漢魏晉皆有此水道非煬帝創開也自唐以前汴泗會于彭城之東北然後東南入淮近歲汴水直達于淮不復入泗矣吳王夫差開溝通水與晉會黃池而江始有入淮之道禹時則無之故禹貢曰浴于江海達于淮泗明非自海入淮則江無通淮之道今徐

州之末直云浮于淮泗達于河不言自海則鴻溝官  
渡汴水之類自禹以來有之明矣特濬堙不常故晉  
劉裕王仲德開鉅鹿入河則泗水不由汴入河其後  
鉅野道塞故汴至彭城東北入泗又東南入淮又其  
後不復入泗直達于淮鉅野道復開由彭城出東平  
而入河汴水不復治矣煬帝豈復濬之乎雖江淮亦  
有可疑者以孟子排淮泗而注之江之言攷之則其  
道尙矣夫差亦復濬之爾

淮海惟揚州

爾雅江南曰揚州注云自江南至海 李巡注曰江南其氣燥勁厥性輕揚故曰揚揚輕也 周禮職方氏東南曰揚州其山鎮曰會稽其澤藪曰具區其川三江其浸五湖 晉地理志引春秋元命苞云牽牛流爲揚州分爲越國以爲江南之氣燥勁厥性輕揚亦曰州界多水水波揚也于古則荒服之國戰國時其地爲楚分

彭蠡既豬

彭蠡 漢水南入于江東匯澤爲彭蠡在彭澤西北

今南康軍湖是也

陽鳥攸居

陽鳥 漢地理志陽鳥攸居作道居 孔叢子小爾

雅廣鳥篇去陰就陽者謂之陽鳥鴻雁是也今日陽鳥豈誤寫鳥字作鳥邪抑亦通稱也邪

三江既入

三江 水經南江東北為長瀆歷河口東南注于具區謂之五湖口東則松江出焉江水奇分謂之三江 口酈道元注曰吳越春秋稱范蠡去越乘舟出江之

口入五湖之中也此亦別爲三江 庾仲初揚都賦  
注曰今太湖東注爲松江下七十里有水口分流東  
北入海爲婁江東南入海爲東江與松江而三也

水經又云三江口之水又東至會稽餘姚縣東入于  
海注云謝靈運云具區在餘姚然則餘暨是餘姚之  
別名也今餘暨之南餘姚西北浙江與浦陽江會同  
歸海但水名已殊非班固所謂南江者也郭璞曰三  
江者浙江松江岷江也然浙江出南蠻中不與岷江  
同作者述誌多言江水至山陰爲浙江今南江枝分

歷烏程縣南通餘杭縣則與浙江合故闕駟十三州志曰江水至會稽與浙江合浙江自臨平湖南通浦陽江又于餘暨東通浦陽江自秦望分派東至餘姚縣又爲江也 顏師古注漢地理志曰三江謂北江中江南江也 韋昭注史記曰三江謂吳松江錢塘江浦陽江也 蘇東坡曰三江之入古今皆不明予以所見攷之自豫章而下入于彭蠡而東至海爲南江自蜀岷山至于九江彭蠡以入于海爲中江自嶓冢導漾東流爲漢過三澁大別以入于江匯爲彭蠡

以入于海爲北江此三江自彭蠡以上爲二自夏口  
以上爲三江漢合于夏口與豫章之江皆匯于彭蠡  
則三江爲一過秣陵京口以入于海不復三矣然禹  
貢猶有三江之名曰北曰中者以味別也蓋以三水  
性不相入江雖合而水味異故至于今而有三泔之  
說古今稱唐陸羽知水味三泔相雜而不能欺不可  
誣也予又以禹貢之言攷之若合符節書之叙漢水  
也曰嶓冢導漾東流爲漢又東爲滄浪之水過三澨  
至于大別南入于江東匯澤爲彭蠡東爲北江入于



海夫漢旣已入江且滙爲彭蠡矣安能復出爲北江以入于漢乎知其以味別也書之叙江水也曰岷山導江東別爲沱又東至于澧過九江至于東陵東迤北會于匯東爲中江入于海夫江旣已與漢合且匯爲彭蠡矣安能自別爲中江以入于海乎知其以味別也漢爲北江岷山之江爲中江則豫章之江爲南江不言可知矣禹以味別信乎曰濟水旣入于河而溢爲滎禹不以味別安知滎之爲濟也歟堯水之未治也東南皆海豈復有吳越哉及彭蠡旣豬三江入

海則吳越始有可宅之土水之所鍾獨震澤而已故  
曰三江旣入震澤底定孔安國以爲自彭蠡江分爲  
三入震澤爲北江入于海疏矣蓋安國未嘗南遊案  
經文以意度之不知三江距震澤遠甚決無入理而  
震澤之大小決不足以受三江也班固曰南江從會  
稽吳縣南入海中江從丹陽蕪湖縣西東至會稽陽  
羨東入海北江從會稽毗陵縣北東入海會稽丹陽  
容有此三江然皆是東南枝流小水自相派別而入  
海者禹貢所謂中江北江自彭蠡出者也徒見禹貢

有三江中北江之名而不悟一江三泠合流而異味也故雜取枝流小水以應三江之數若使此三者爲三江則是與今京口入海之江爲四矣京口之江視此三者猶畎澮禹獨遺大而數小何邪此蘇氏之說也予謂三江之說古今諸儒互相矛盾學者徒取北江中江以爲三江之目而不知禹貢中無南江之目是未免乎牽合也蘇氏味別之說尤爲難據且江漢之水皆匯爲彭蠡以入海而不三出矣安有中北之辨乎況三江距震澤爲遠禹貢言三江旣入然後震

澤之水有所洩而底定明知揚州之地自有三江非  
江漢中江之江也案水經有三江口五湖口疑禹貢  
所謂三江者卽三江口也蓋言三江口水入海則震  
澤之水有所洩而底定此理甚明其文連屬震澤而  
設非謂南江中江北江與義興毗陵吳縣之江也故  
導川叙江與漢雖言中江北江而不言三江是知三  
江爲三江口也猶言五湖然虞翻曰太湖有五湖曰  
滬湖曰洮湖曰射湖曰貴湖與太湖而五並太湖之  
小支俱連太湖兼得五湖之名在今湖州東卽水經

所謂南江東北爲長瀆歷河口東南注于具區謂之五湖口東則松江出焉江水奇分謂之三江口吳越春秋稱范蠡去越乘舟出三江之口入五湖之中是也非謂洞庭番陽青草之五湖也蘇氏以岷山之江爲中江漢水爲北江豫章之江爲南江不知豫章之江何從出哉使豫章之江同入于匯澤而入海則書當叙豫章之江北入中江如滄浪南入于江之類可也今則不聞是亦未免牽合也以書攷之其曰東迤北會于匯東爲中江入于海孔氏傳曰迤溢也東溢

分流北會彭蠡舉其說謂岷山之江本不匯于彭蠡  
但迤溢分流爲二其支北匯于彭蠡出爲中江其本  
爲南故漢江爲北而王荆公以謂一江自義興一江  
自毗陵一江自吳縣義興古之陽羨毗陵今之丹徒  
春秋謂之延陵季札所居之地吳縣今之吳江三江  
介于常潤蘇三州之間而震澤瞰乎三州之界尾通  
吳興苕霅之水出焉此言殆與班固相表裏然雖詳  
而無統槩之禹貢之文不若孔氏之傳爲稍長亦未  
允也

震澤底定

震澤 爾雅吳越之閒有具區郭注今吳縣南太湖  
卽震澤是也 國語越伐吳而戰于五湖又云范蠡  
滅吳返至五湖而辭越斯乃太湖之通稱也虞翻曰  
是湖有五道故曰五湖韋昭曰今太湖是也尙書謂  
之震澤爾雅以爲具區方圓五百里 水經震澤在  
吳縣南五十里又曰中江在丹陽蕪湖縣南東至會  
稽陽羨縣入于海北江在毗陵北界東入于海注云  
地理志曰江水自石城東出逕吳國南爲南江江水

自石城東入爲貴口東逕石城縣北 水經南江又  
東與貴長池水合又南逕宣城之臨城縣南又東與  
桐水合又東逕寧國縣南又東北爲長瀆歷河口東  
南注于具區東則松江出焉江水奇分謂之三江口  
顏師古曰五湖在吳 越絕書曰太湖周三萬六  
千頃 沈括曰司馬相如上林賦叙上林諸水曰丹  
水紫淵灞澹涇渭八川分流相背而異態灑滌潢漾  
東注太湖八川自入大河大河去太湖數千里中間  
隔大山及淮濟大江何緣與太湖相涉郭璞江賦云



注五湖以漫漭灌三江而瀚沛墨子曰禹治天下南  
爲江漢淮汝東流注之五湖孔安國曰自彭蠡江分  
爲三入于震澤復爲北江而入于海此皆未詳攷地  
理江漢至五湖自隔山其末乃繞出五湖之下流徑  
入于海何緣入于五湖淮汝自逕徐州入海全無交  
涉禹貢曰彭蠡既豬陽鳥攸居三江既入震澤底定  
以對文言則彭蠡水之所豬三江水之所入非入于  
震澤也震澤之源皆山環之了無大川震澤之委則  
多大川亦莫知孰爲三江者蓋三江之水無所入則

震澤壅而爲害三江之水有所入然後震澤底定此  
水之理也沈氏論上林賦及孔安國之誤明矣然以  
爲彭蠡水之所豬三江水之所入是水豬于彭蠡入  
于三江也豬于彭蠡者江漢之所匯是也入于三江  
者果何水乎且經言三江旣入乃謂三江之水旣入  
于海非謂水入三江也沈氏又云三江之水無所入  
則震澤壅而爲害三江之水有所入然後震澤底定  
乃是三江水入海而非水入三江也若以爲三江水  
有所入然後震澤底定則是三江與震澤相通而非

岷江漢江也通震澤者惟松江則水經所謂三江口者近之矣然禹貢所言三江既入震澤底定蓋總記揚州水患既平三江之水已入于海無汎濫之患震澤之水亦底于靜定有涵浸之潤灌溉之功未必謂二者相通此有所入而後彼有所定也

瑤琨篠簜

瑤琨 漢地理志琨作瓊

島夷卉服厥篚織貝

島夷 南海島夷織草木爲服如今棘貝蕉葛之屬

棘貝閩俗呼爲木棉 漢地理志作鳥夷顏師古曰  
鳥夷東南之夷善捕鳥者也卉服絺葛之屬

筐織貝 顏師古曰織謂細布也貝水蟲也古以爲  
貨

沿于江海達于淮泗

漢地理志作均江海通于淮泗顏師古曰均平也通  
淮泗而入海故云平 揚州不言河因徐州而見也  
徐州之末言浮于淮泗達于河謂渡淮泗而入河揚  
州次徐故言達于淮泗順流而下曰沿沿江海以通

淮泗則浮淮泗可以通河矣 左傳沿漢沂江杜預  
曰沿順流沂逆流

禹貢指南卷二

宋

毛

晃

撰

荆及衡陽惟荊州

荊州 爾雅漢南曰荊州注云自漢南至衡山之陽

李巡曰荊州其氣燥剛稟性彊梁故曰荊荆彊也秦

爲南郡卽郢都之渚宮楚之故都也 周禮職方氏

正南曰荊州其山鎮曰衡山其澤藪曰雲夢其川江

漢其浸潁湛注衡山在湘南雲夢在華容潁出陽城

宜屬豫州在此非也湛未聞 晉地理志引春秋元

命苞云軫星散爲荊州荆疆也言其氣燥疆亦曰警也言南蠻數爲寇逆其人有道後服無道先叛易警備也又云取名于荆山荆取名于荆山其義最近荆者小木名亦曰楚故春秋書楚爲荆

江漢朝宗于海

江水 出岷山 水經江水自天彭關東逕汶關而歷氏道縣北酈注云益州記曰自白馬嶺迴行二千餘里至龍涸又八十里至西陵縣又南下六十里至石鏡又六十餘里而至蜀郡北部始百許步又西百

二十餘里至汶山故郡乃廣二百餘步又西南百八  
十里至濕坂江稍大矣故其精則井絡纏曜江漢昞  
靈河圖括地象曰岷山之精上爲井絡帝以會昌神  
以建福故禹貢曰岷山導江泉流深遠盛爲四瀆之  
首廣雅曰江貢也風俗通曰出珍物可貢獻釋名曰  
江共也小水流入其中所公共也

漢水 漢出蟠冢之漾漾水東南流爲沔至漢中東  
行爲漢 水經注云山海經漢出鮒嶠山東北流得  
獻水口庾仲雍曰是水南至關城合西漢水漢水又



東北合沮口同爲漢水之源也故如淳曰北方人謂漢爲沔水孔安國謂漾水東流爲沔蓋與沔合也至漢中爲漢水是互相通稱也又云沔水一名沮水關駟曰以其初出沮沔然故曰沮水也 水經沔水出武都沮縣東狼谷中因水名縣楚昭王所謂江漢沮漳楚之望也酈注引庾仲雍言漢水自武遂川南入蔓葛谷越野牛逕至關城合西漢水故諸言漢者多言西漢水至葭萌縣入漢又曰始源曰沔是以經云漾水出氐道縣東至沮縣爲漢水東南至廣魏白水

診其沿注似與三說相符而未極西漢之源矣然東西兩川俱受沔水之名義或在茲班固地理志司馬彪袁山松郡國志並言漢有二源東出氐道西出隴西縣之蟠冢山鬪駟云漾或爲洋洋水出岷崙西北隅至氐道重源顯發而爲漾又言隴西縣蟠冢山在西西漢水所出南入廣魏白水又云漾水出獮道東至武都入漢許叔重呂忱並言漾水出隴西獮道東至武都爲漢水不言氐道然獮道在冀之西北又隔諸川無水南入疑出獮道之爲謬矣山海經曰蟠冢

再重刊  
卷二  
之山漢水出焉而東南流注于江然則東西兩川俱  
出蟠冢而同爲漢水者也孔安國曰泉始出爲漾其  
猶濛耳而常璩華陽國記專爲漾山漾水者是作者  
附而爲山水之殊目爾

### 九江孔殷

賈耽所記江有八洲與江爲九非經意也 孔安國  
曰江于此州界分爲九道甚得地勢之中 張須元  
緣江圖云一曰三里江二曰五州江三曰嘉靡江四  
曰烏土江五曰白蚌江六曰白鳥江七曰筍江八曰

沙提江九曰廩江參差隨水長短或百里或五十里  
始于鄂陵終于江口會于桑落洲 水經九江在長  
沙下雋西北楚地記曰巴陵瀟湘之淵在九江之間  
今岳州巴陵縣卽楚之巴陵漢之下雋也洞庭正在  
其西北則洞庭之爲九江審矣

### 沱潛旣道

沱水 水經沱水在南郡枝江縣西南其一在鄆縣  
西南皆還入江荊州記沱水在南郡枝江縣三澁地  
之南邵縣之北

潛水 潛水出天柱山天柱山亦名霍山 孔安國  
梁州下注云沱潛發源梁州入荊州 水經注庾仲  
雍云墊江有別江出長壽縣卽潛水也其南源取巴  
西是西漢水也 爾雅曰水自江出爲沱自漢出爲  
潛

雲土夢作父

爾雅楚有雲夢郭注今南郡華容縣東南巴邱湖是  
也 案春秋傳昭公三年鄭伯如楚子產相旣享子  
產備田具以田江南之夢定公四年吳入郢楚子涉

睢濟江入于雲中則雲與夢二土名杜預曰枝江縣  
安陸縣有雲夢蓋跨川亘隰兼包勢廣今德安府有  
雲夢縣 晉武帝太康五年立監利縣土卑下澤多  
陂池西南自州陵東界逕于雲杜沌陽爲雲夢之藪  
陸德明釋文夢音莫紅切 漢高帝紀僞遊雲夢  
韋昭曰雲夢在南郡華容縣顏師古曰夢讀如本字  
又音莫紅切 司馬相如賦吞若雲夢者八九 九  
域志安州今德安府安陸縣雲夢鎮昔爲縣熙寧三  
年省縣爲鎮入安陸周禮職方氏注雲夢在華容鄭

氏據後漢時封域言之今華容爲岳州支邑與雲夢  
隔遠 沈括曰舊尙書禹貢云雲夢土作又至太宗  
皇帝時得古本尙書作雲土夢作又詔改禹貢從古  
本予按孔安國注雲夢之澤在江南不然也據左傳  
吳人入郢楚子涉睢濟江入于雲中王寢盜攻之以  
戈擊王王奔鄖楚子自郢西走涉睢則當出于江南  
其後涉江入于雲中遂奔鄖鄖則今之安州濟江而  
後至雲入雲而後至鄖則雲在江北也左傳曰鄭伯  
如楚王以田江南之夢杜預曰楚之雲夢跨江南北

曰江南之夢則雲在江北明矣元豐中予自隨州道安陸入于漢口有竟陵主簿郭思者能言漢沔閒地理亦以謂江南爲夢北爲雲予以左傳審之思之說信然江南則今之公安石首建寧等縣江北則玉沙監利竟陵等縣乃水所委其地最下江南水所出地稍高雲方土而夢已作乂矣此古本之爲允也

厥貢羽毛齒革礪砥磬丹

漢地理志礪作厲羽毛作羽旄

三邦底貢厥名



三邦 荆州之域有蠻荆楚三國皆貢篋箛楛顏師古曰篋箛竹名楛木名皆可爲矢言此州界本有三國致貢斯物其名稱美也 案春秋書荆人來聘卽楚人也詩稱因時百蠻蠻非一國之名謂蠻荆楚爲三邦恐非經意攷工記云才之美者有妣胡之筥鄭注胡子之國在楚旁豈三邦之類歟

浮于江沱潛漢逾于洛至于南河

漢地理志潛作潛顏師古曰浮以舟渡也逾越也言渡四水而越洛乃至南河也南河在冀州南江漢去

洛遠而不相通越陸跨洛故曰逾

### 荆河惟豫州

豫州 爾雅河南曰豫州注云自南河至漢李巡曰  
河南其氣著密厥性安舒故曰豫豫舒也 周禮職  
方氏河南曰豫州其山鎮曰華山其澤藪曰圃田其  
川滎雒其浸波澆注波讀爲播春秋傳曰楚子除道  
梁澆營軍臨隨則澆宜屬荊州在此非也當攷 釋  
名曰豫州在九州中京師東常安豫也秦爲三川郡  
漢爲河南郡後魏置司州又改爲豫州 晉地理志

豫州按禹貢爲荆河之地豫者舒也言稟中和之氣  
性理安舒也春秋元命苞云鈎鈐星別爲豫州地界  
西自華山東至于淮北自濟南界荆山

伊洛漣澗旣入于河

伊水 水經伊水出南陽縣西蔓渠山東北過郭落  
山又東北過陸渾縣南又東北過新城縣南又東北  
過伊闕中又東北至洛陽縣南北入于洛酈注曰山  
海經蔓渠之山伊水出焉淮南子曰伊水出上魏山  
地理志曰伊水出熊耳山卽麓大同陵巒互別耳昔

有莘氏女采桑於伊川得嬰兒於空桑中長有賢德  
殷以爲尹曰伊尹

洛水 水經洛水出京兆謹舉山東尸水注之又東  
得乳水又東會于龍餘之水又東門水出焉又東逕  
熊耳山北禹貢所謂導洛自此始山海經曰出上洛  
西山又曰謹舉之山洛水出焉又曰陽虛之山臨于  
元扈之水是爲洛汭注陽虛鹿蹄以至元扈凡九山  
通與謹舉爲九故山海經曰此二山者洛閒也又博  
物志曰洛水出熊耳蓋開其源者是也 漢志洛作

雒魏略曰魏文帝詔以漢火行也火忌水故洛去水而加佳魏于行次爲土土水之牡也水得土而乃流土得水而柔故除佳加水變雒爲洛按字書雒本鳥名一名烏鷄故從各從佳各聲佳形佳小鳥也漢人忌水借用雒字以代洛字魏復水名本字耳非創變也

漣水 水經漣水出河南穀城縣北山東與千金渠合又東過洛陽縣南又東過偃師縣又東入于洛

澗水 水經澗水出新安縣南白石山東南入于洛

注云山海經白石之山惠水出其陽東南注于洛澗  
水出其陰北流注于穀 孔安國曰澗水出澗池山  
今新安縣北有一水北出澗池界東南流逕新安縣  
而東南流入于穀安國所言當斯水也然穀水出澗  
池下合澗水得其通稱或亦指爲澗水也澗池屬西  
京亦作黽

滎波旣豬

滎波 今滎陽在河南春秋衛狄戰于滎陽當在河  
北孔穎達謂此澤跨河南北也禹貢不曰滎澤而曰

滎波者堯時滎澤常波今始豬也 或說爾雅曰洛

爲波洛受灑水澗水又伊水之所出其爲泛溢滋甚

今始豬也 水經注亦曰滎播又引風俗通曰河播

也謂沆水東流爲濟入于河溢爲滎則滎波亦謂之

滎播可也又曰穀水又東波水注之山海經曰瞻諸

山西三十里婁涿之山無草木多金玉波水出于其

陰謂之北荅水北流注于穀水經又曰濟水入河與

河合流又東過成臯縣北又東過滎陽縣北注引釋

名曰濟濟也源出河北濟河而南也晉地理志曰濟

自大伾入河與水鬪南洑爲滎澤闕駟曰滎波嶓澤名也故呂忱云嶓水在滎陽謂是水也昔禹塞其淫水而于滎陽下引河東南以通淮泗濟水分河東南流 滎周禮詩正義左傳皆作熒

導潁澤被孟豬

潁澤 沅水東出于陶邱北又東爲潁澤在濟陰定陶縣東潁音柯亦作苛 漢志潁澤在湖陵孟豬在潁澤之東

孟豬 在梁國睢陽縣東北潁澤之水流溢覆被之



也 爾雅宋有孟諸郭注在今梁國睢陽縣東北案  
梁國今大梁汴州睢陽今宋州大梁之大音泰非小  
大之大魏有少梁對大梁立名大梁唐爲宣武節鎮  
五代至本朝爲京師 杜預曰孟諸澤在梁國睢陽  
縣東北逕郟城縣故城南案地理志曰山陽郡山陽  
縣也王莽更爲郟城春秋之郟國也此山陽非楚州  
之山陽 水經明都澤在梁郡睢陽縣東北卽孟豬  
也周禮職方氏青州其澤藪曰望諸漢志作盟豬史  
記作明都案釋文都音豬則明與盟同盟津之盟音

孟此亦當音孟

華陽黑水惟梁州

梁州 爾雅無梁青有幽營徐蓋爾雅九州商之制也商時梁州或并于雍也周禮職方氏無徐梁有幽并蓋周亦併梁歸于雍也周之西南不置州自坤維以西統于雍以南統于荆漢武帝改雍曰涼改梁曰益 梁之東北雍之東南以華爲畿 晉太康地記云梁者言西方金剛之氣彊梁故因名之秦爲漢中郡後其地入蜀魏末蜀分廣漢三巴涪陵以北七郡

爲梁州梁武帝大同中復移在南鄭 晉地理志春  
秋元命苞云參伐流爲益州益之爲言阨也言其所  
在之地險阨也亦曰疆壤益大故以名焉又曰梁者  
言西方金剛之氣疆梁故因名焉

岷嶓旣藝

岷山 水經岷山在蜀郡湔氐道西注云漢書以爲  
瀆山者是也江水出自岷山岷山在成都湔氐道西  
徼外江水所出東南至江都入海又云岷山在蜀郡  
氐道縣大江所出東南過其縣北注岷山卽瀆山也

水曰瀆水。又謂之汶阜山在徼外。江水所導也。益州記曰：大江泉源卽今所聞始發羊膊嶺下，緣崖散漫，小大百數，殆未濫觴。東南下百餘里，至白馬嶺而歷天彭闕，亦謂爲天谷。秦昭王以李冰爲蜀守，冰見氏道縣有天彭山，兩山相對，其形如闕，謂之天彭門。亦曰天彭闕。江水自此以上至微細，所謂發源濫觴者也。漢延平中，岷山崩，壅江水三日不流。揚雄反離騷，自岷山投諸江流，以弔屈原。

嶓冢山 水經嶓冢山在宏農盧氏縣南，注是山也。

穀水出其北林又云蟠冢山在隴西氏道縣之南注南條山也禹貢漾水導自蟠冢山在隴西是也在宏農者名偶同耳

沱潛旣道

沱潛二水 沱出于江潛出于漢二水發源此州而復出于荊州故于荊州云沱潛旣道而于末又云浮于江沱潛漢

蔡蒙旅平

蔡山 書正義蔡山不知所在鄭氏云在漢嘉一說

在雅州

蒙山 在蜀郡青衣縣其上出茶俗呼爲蒙頂茶

和夷底績

和夷 西南夷

厥土青黎

顏師古曰色青而細疏

厥貢璆鐵銀鏤磬磬熊羆狐狸織皮

貢璆鐵銀鏤磬磬熊羆狐狸織皮以屬曰織以裘曰

皮 孔安國曰璆玉名鏤剛鐵貢四獸之皮織金屬

織皮上疑脫厥篚二字 顏師古曰織皮謂屬也  
言貢四獸之皮又貢雜屬也

西傾因桓是來浮于潛逾于沔入于渭亂于河

西傾山 在隴西臨洮縣西南在今洮州桓水出焉

漢地理志作西頃音傾顏師古曰西頃山在臨洮

西南是為中條山

桓水 桓水入潛潛入沔

沔水 出嶓冢山為漾水東南流為沔沔至漢中東

行為漢詩沔水傳沔水流滿也詩雖汎言流水此沔

之名義則同 顏師古曰漢上曰沔正絕流曰亂言  
渡潛越沔得入于渭遂橫流濟河也或疑禹貢言西  
傾因桓是來繼言浮于潛逾于沔入于渭意謂自桓  
入潛自潛入沔自沔入渭非也蓋沔在梁州山南渭  
在雍州山北無入渭之道經言逾者逾越也自沔越  
陸而入渭其不相通可知顏師古謂越沔得入于渭  
是也 蘇氏曰雍州之達帝都必自西傾自西傾因  
桓水而來浮潛而逾沔至渭陸行百餘里然後逾渭  
以亂于河亂者絕流之義也蓋自西傾因桓至亂于



河皆是此州達于帝都之道

黑水西河惟雍州

雍州 爾雅河西曰雍州注云自西河至黑水李巡

曰河西其氣蔽塞厥性急凶故曰雍雍壅也 周禮

職方氏正西曰雍州其山鎮曰嶽山其藪澤曰弦蒲

其川涇汭其浸渭洛 洛在渭北非河南洛水 地理風俗記曰

漢武帝元朔三年改雍曰涼州以其金行土地寒涼

故也 後漢獻帝以武帝改雍曰涼又分渭川河西

郡為雍州至建安十八年復改為涼州 晉地理志

雍州以其四山之地故以雍名焉亦謂西北之位陽所不及陰陽氣雍闕也 釋名曰雍翳也東嶠西漢南商北居庸四山之所擁翳也

弱水既西

弱水 鴻毛不載至酒泉合黎張掖郡居延縣東北居延澤卽流沙河也合黎山水經謂之合離在酒泉會水縣東北注云卽合黎山也地志弱水出刪丹縣亦謂之張掖河

涇屬渭汭

渭水 導出鳥鼠山會四水然後入河詳見導川卷內

涇水 渭清涇濁漢溝洫志涇水一石其泥數斗

九域志今涇州有涇水屬秦鳳路 鄭氏謂涇水出洛陽指渭北洛水之陽陽水北也

漆沮既從

漆水 渭水東過漆沮入于河 水經漆水出扶風

杜陽縣俞山東北入于渭注云山海經兪次之山漆水出焉北流注于渭蓋自北而南矣史記夏本紀引

禹貢導渭水東北至涇又東過漆沮入于河孔安國  
曰漆沮二水名亦曰洛水也出馮翊北周太王去邠  
度漆逾梁山止岐下故詩云民之初生自土沮漆又  
曰率西水滸至于岐下是符禹貢本紀之說許慎說  
文稱漆水出右扶風杜陽縣岐山東入渭從水秦聲  
又云一曰漆城池也潘岳關中記曰關中有涇渭灃  
澹豐鄠漆沮之水豐鄠漆沮四水在長安西南鄠縣  
皆注于渭

沮水 水經沮水出北地直路縣東過馮翊殺羽縣

北東入于洛注云地理志沮水出畿縣西東入洛鄭渠在漢太上皇陵東南濁水入焉俗謂之漆水又謂之漆沮其水東入洛孔安國謂漆沮一名洛水此言漆沮東入洛非漆沮卽洛水也長安志洛水在渭北東南流入渭蓋漆沮入洛故俗呼漆沮爲洛耳漢地理志漆水出漆縣西闕駟十三州志云漆水出漆縣西北岐山東入渭顏師古曰漆沮卽馮翊之洛水也澧水出鄠之南山言漆沮旣從入渭澧水亦來同也又漢五行志引史記周幽王二年三川皆震師古曰

涇渭洛也洛卽漆沮也水經注又引闕駟十三州志曰馮翊萬年縣西有涇渭北有小河謂漆水也其水西南逕郭穰城西與白渠枝渠合又南入于渭水其一水東出卽沮水也沮水又自沮直絕注濁水至白渠合焉故濁水得漆沮之名也

灋水攸同

灋水 出扶風鄠縣東南北過漢上林苑入渭灋音豐 水經渭水又東灋水從南來注之注云地說曰渭水又東與灋水會于短陰山內水會無他高山異

巒所有唯原阜石激而已水上舊有便門橋漢武帝  
建元三年造如淳曰去長安四十里 漢地理志灃  
作豐

荆岐旣旅終南惇物至于鳥鼠

荆山 在馮翊懷德縣南 荆山有二一在南郡臨

沮縣東北在梁州者謂之南條在雍州者謂之北條

西傾山在隴西臨洮縣西南謂之中條 左傳昭公

四年晉大夫司馬侯曰四嶽三塗陽城大室荆山中

南九州之險也杜預曰荆山在新城沛鄉縣南沛音

市鄉音向 漢地理志注荆山在岐東

岐山 水經曰在扶風美陽縣西北 左傳椒舉曰  
成王有岐陽之蒐 山海經曰其上多白金其下多  
鐵減水出焉東南流注于江 顏師古漢書注曰岐  
山在今岐山縣其山兩岐俗呼爲箭栝嶺

終南山 扶風武功縣東有太一山卽終南山也

左傳司馬侯所言終南杜預注曰在始平武功縣南  
漢地理志右扶風武功縣注大壹山古文以爲終  
南垂山古文以爲敦物二山皆在縣東



惇物山 扶風武功縣東有垂山卽惇物山也 水  
經華山爲西嶽在宏農華陽縣西南注云卽古文之  
惇物山也

鳥鼠山 水經鳥鼠同穴山在隴西首陽縣西南注  
曰鄭康成云鳥鼠之山有鳥焉與鼠飛行而處之又  
有止而同穴之山焉是二山也鳥名爲鷓似鷄而黃  
黑色鼠如家鼠而短尾穿地而共處鼠內而鳥外孔  
安國曰共爲雌雄杜亮威曰同穴止宿養子互相哺  
食長大乃止張晏言不爲牝牡故因以名山爾雅其

鳥爲駮其鼠爲鼯

原隰底績至于豬野

豬野 幽地武威縣東有休屠澤卽豬野也休屠音  
朽儲水經都野澤在武威縣東北注云縣在姑臧城  
北三百里東北卽休屠澤也古文以爲豬野其水上  
承始臧武始澤澤水二源東北流爲一水姑臧縣故  
城西東北流

三危旣宅三苗丕叙

三危山 水經三危山在燉煌縣南燉煌音屯皇注

云山海經三危之山三青鳥居之是山也廣員百里  
在鳥鼠山西卽書所謂窳三苗于三危也杜林曰燉  
煌古瓜州也州之貢物地出好瓜民因名之自漢武  
帝後元年分酒泉置南七里有鳴沙山故亦曰沙州  
也 左傳云先王居橐杻于四裔故允姓之姦居于  
瓜州杜預曰允姓之祖與三苗俱放于三危瓜州今  
燉煌也

厥田惟上上厥賦中下

右九州之田雍青徐爲上豫冀兗爲中揚梁州爲下

蓋河之末流在兗江之末流在揚二州多水患梁地  
多山兗賦居最下等九輕于揚故兗賦爲正梁之賦  
輕于揚重于兗故言三錯兗之田下冀一等而賦下  
冀八等以山澤多河爲大患也梁下冀一等而賦下  
冀五等以山林多江爲大患也荆田下中賦上下則  
以其宜稻雍田上上徐田上中青田上下地勢雖高  
然皆依于川故其旱乾又有灌溉之利故青州上下  
之田也而賦中上徐州上中之田也而賦中中雍州  
上上之田也而賦中下皆以上地出中賦然地彌高

者賦彌薄以其高則有旱乾之虞冀田中中則其高  
可以備水溢卑可以無旱乾故其賦第一鄭康成曰  
冀州入穀不貢下云五百里甸服傳云爲天子服治  
其田是田入穀故不獻貢篚差異于餘州也甸服止  
方千里冀之北土境界甚遙遠都之國必有貢篚此  
舉其大略而言也豫州之田中上則高于冀一等故  
其賦上中則下于冀一等冀賦上上錯則雜出與豫  
等豫賦錯上中則雜出與冀等二州之田與賦相去  
亦不遠矣若荆之田高于揚一等而已其土又與揚

同而賦加揚四等何也荆揚下地于穀宜稻荆少高  
焉則水有所洩異於揚矣

右九州之賦唯出正賦而無雜賦者五州兗青徐荆  
雍也有雜賦者四州冀揚豫梁也冀州言賦上上錯  
蓋上上多而上中時少多者爲正少者爲雜言上上  
錯者雜在正下故言上上而後言錯豫州言錯上中  
者雜在正上故先言錯而後言上中揚州言下上上  
錯不言錯下上者以本設九等分三品爲之上中下  
下上本是異品故變言耳梁言下中三錯者梁州賦

有三等其出下中時多故下中爲正上有下上下有下下三等故言三錯明雜出有下上下下可知也

浮于積石至于龍門西河會于渭汭

顏師古曰積石山在金城西南龍門山在河東之西界皆河水所經逆流曰會自渭北涯逆水西上也

織皮崑崙析支渠揆西戎卽叙

織皮崑崙析支渠揆 織皮上疑簡編脫厥篚二字

不然則是史變文耳禹貢之篚皆在貢後立文而青徐揚三州皆萊夷淮夷島夷所篚獨梁州不言篚而

云熊羆狐狸織皮雍州不言篚而云織皮崑崙析支  
渠揆西戎卽叙織皮云者以屬曰織以裘曰皮言西  
戎卽叙而後崑崙析支渠揆三國篚織皮以獻但古  
語有顛倒詳略爾三國在荒服之外流沙之內羌髡  
之屬皆就次叙美禹之功被戎狄也文當在厥貢球  
琳琅玕下簡脫在末也漢地理志渠揆作渠叟崑崙  
作昆崙

右九州之名因革不同案周公職錄云黃帝受命風  
后受圖割地布九州鄴子曰中國爲赤縣赤縣之內



有九州春秋說題辭曰州之言殊也爾雅釋水云水中可居曰洲李巡曰四方有水中央高獨可居故曰洲天地之勢四邊有水鄒衍書說九州之外有瀛海環之是九州居水內故以州爲名共在一洲之上分之爲九耳漢地理志堯遭洪水懷山襄陵天下分爲十二州使禹治之水土旣平更制九州由是觀之九州原缺當堯之時九年之水疆理錯亂故禹復治而別之至原缺盛肇十有二州分冀爲幽并分青爲營更三代復原缺爾雅兩河閒曰冀州河南曰豫州河

西曰雒州漢南曰荊州江南曰揚州濟河間曰兗州  
濟東曰徐州燕曰幽州齊曰營州郭璞注曰此蓋商  
制周禮職方氏東南曰揚州正南曰荊州河南曰豫  
州正東曰青州河東曰兗州正西曰雍州東北曰幽  
州河內曰冀州正北曰并州原缺帝都所在天傾西  
北地不滿東南治水自下始故由冀而東南次兗由  
兗而東南次青由青而東次徐由徐而南次揚由揚  
而西次荊由荊而北次豫由豫而西次梁由梁而北  
次雍此先後始終之序也職方氏先揚次荊先南方

蓋取尊其陽方也後漢獻帝建安十八年春正月庚寅復禹貢九州又獻帝春秋曰時省幽并州以其郡國并于冀州省司隸校尉及涼州以其郡國并于雍州省交州并爲荊州益州于是有兗豫青徐荆揚冀益雍也九數雖同而禹貢無益州有梁州然梁益均此地也又職方氏注云此州界揚荆豫兗雍冀與禹貢略同青州則徐州地也幽并則青冀之北也無徐梁漢時兩河屬司州蓋屬京師司隸校尉所部故曰司州昭帝始元元年有司請河內屬冀州河東屬并

州 凡九州之末皆言由諸水入河如冀兗徐荆豫  
梁雍州各自言河惟青揚二州不言河耳兗州云浮  
于濟漯達于河故青州直云達于濟徐州云浮于淮  
泗達于河故揚州云達于淮泗皆記禹入河之道也  
孔安國以爲禹治水畢還白于帝所以治其道由此  
鄭康成以爲治水旣畢更復行之觀地肥瘠定貢賦  
上下王肅云凡州之下說諸治水者也功主于治水  
故詳記其所治之州往還所乘涉之水名三說皆未  
通惟近世周希聖以爲天子之都必求舟楫之所可

至使諸侯之朝貢商賈之貿易雖其地遠而轉輸甚  
易此說爲長禹貢上言田賦貢篚之事而下言所以  
達都之道則九州賦入視貢篚爲尤重此蓋轉輸之  
大者也九州惟梁雍二州西境與羌戎連接地界闊  
遠與七州不同荆揚雖地接百越然界以五嶺諸山  
連亘自川蜀至明越山之北水皆北流其南皆南流  
以入南海亦不甚遠並爲中國故山川地理灼然可  
攷若梁雍之西隔以羌戎諸國去西海遠甚多與中  
國不通故禹貢叙二州西境皆以黑水爲界故雍州

首言弱水既西而導川亦止言餘波入于流沙而不  
竟其所歸二州雖以黑水爲界而不叙黑水濬導經  
歷之曲折導川亦止導黑水至于三危入于南海夫  
自雍至梁自梁至南海其遠可知而載之甚略豈非  
以其闊遠而不勝紀乎抑其無與中國生民之休戚  
而略之乎史志及諸家言黑水弱水互有異同率多  
牴牾姑撮其梗概辨其誤而闕其疑以俟博達君子  
而折衷焉

弱水 漢志云在西王母石室近酒泉崑崙山又云

弱水出條支漢西域傳媯水自于闐之西逕大夏西  
流至條支入西海或以此爲弱水水經刪丹弱水出  
酒泉合黎以居延澤爲流沙河在東合黎在西班固  
許叔重同此說若東入居延澤又西入合黎是分流  
非餘波入流沙亦非旣西也與經恐不合廣韻云弱  
水出龍道山隋志弱水在張掖又別有弱水在扶州  
唐史弱水在甘州城北張掖郡名張掖河亦名副援  
河又云甘峻山賈耽同此說唐史又云小勃律娑夷  
河東女康延川是弱水娑夷河在天竺東于闐南不

西流康延川南流亦不西流樊綽續書蘭蒼江源出  
大雪山下沙川又云康延川南流其國東接茂州東  
南接雅州皆在益州西非雍州境或以爲此乃黑水  
亦與經不合

黑水 水經云出張掖雞山南流至燉煌過三危入  
于南海或謂張掖在甘肅二州界隔大河不能至南  
海漢志犍爲南廣縣有符黑水向北流入江言北流  
入江非經之黑水明矣杜佑謂此黑水逕沙州三危  
山過南溪而入南海犍爲卽唐戎州沙州與戎州隔



大河又隔金城南山及西南夷山亦不能入南海隋志黑水在扶州李吉甫元和郡縣志漢武通西南夷分雍之南置益州益州本滇王國因滇池立名黑水祠在其地孔穎達以爲有祠無水則滇池亦非黑水也樊綽蠻書黑水一名麗水出三危山之南過邏些城蒼望城蒼王道勿川合彌諾江經驃國入西海之南邏些城在蜀西非雍州界經言導黑水至于三危是在三危北南流過三危今言麗水出三危南與經不合或謂漢志勞水出徼外會葉榆水入南海疑葉

榆是黑水然葉榆澤在嶺州南界益州葉榆縣西南  
流過滇池縣西珥河會勞水南流入南海水經葉榆  
水出益州入牂牁西過交趾分爲五水復合爲三東  
入海樊綽蠻書葉榆西流過點蒼山至兩江口與摩  
耶江合又云浪穹河巴嶠河劍河三水俱入黃塘江  
過西珥河爲摩耶江乃與葉榆江合然則葉榆江與  
西珥河自是兩派又與漢志相牴牾况葉榆水在蜀  
之正西西行又東流入海去雍州遠甚亦與經不合  
觀先儒所刊禹迹圖黑水在雍州西北而西南流至

雲南之西南乃有黑水口東南流而入南海中間地  
理闊遠不復圖其所經蓋亦古人略而不詳之遺意  
抑以諸家之說各有闕失難以攷信不容以臆說傳  
會歟

